

Դարբասներից մէկի դրան ճակատին կախւած է «Արքայական» կոչւած տախտակը, որ միկադօի նւէրն է եւ որի վրա ոսկէ տառերով գրւած է հանգուցեալ սիօգունի անդրաշխարհիկ անունը: Ճապոնացիք խիստ գնահատում են գեղեցիկ գիրը, եւ ճիշտն ասած՝ ճապոնական գիրը շատ գեղարւեստական է: Իզուր չեն ասել, որ նրանք նկարում են այնպէս, ինչպէս գրում են, եւ գրում են այնպէս, ինչպէս նկարում:

Իմ հիացումս աւելի սաստկացաւ, երբ ես քաթանի հողաթափները կօշիկներին անցնելով՝ մտայ տաճարը: Շուրջը ամեն բան յղկւած, փորագրւած ու ոսկեզօծ է այն աստիճան, որ մարդու աչքը շլանում է: Ամբողջ առաստաղը բաժանւած է քառակուսիների, յղկւած ու լակւած, իսկ ամեն մի քառակուսիի մէջ փիւնիկ թռչունի պատկերն է: Առաստաղի տակ, պատերի վրա փորագրւած են ծաղիկների մէջ թռչկոտող մանրիկ թռչուններ, որոնք հիացմունք են պատճառում իրանց բնական ու մաքուր աշխատանքովը: Աւելի ցած նկարւած են առիւծներ, իսկ գետնին, ձիւնափայլ խսիրների վրա շարւած են գեղեցիկ, յղկւած փոքրիկ սեղանիկներ ու արկղիկները, որոնց մէջ սրբազան ձեռագիրներն են պահւում: Ոսկեվառ խորանը զարդարւած է նրբանկար ծաղկամաններով, ուր օրօրւում է լօտոսը, բուդդահիստների համար մաքրութեան խորհրդանշանը:

Այդ բոլոր շքեղութիւնից յետոյ մի տարօրինակ, գուցէ եւ կրթիչ հակապատկեր է ներկայացնում սիօգունի գերեզմանը, որ աչքի է ընկնում իր գեղեցիկ ու ազնւական պարզութեամբը: